

COMUNICÂT STAMPE

COMUN DI DAVÂR – GLESIE DI SANT MARTIN



SUL FINÎ I LAVÔRS DE AREE ARCHEOLOGJICHE

Tes setemanis passadis a son stâts inmaneâts i lavôrs par risanâ la cuvierture e par ripristinâ l'implant eletric de aree archeologjiche de glesie di Sant Martin vescul a Davâr (UD). Tacant dai agns '90, sgjâfs stratigrafics a àn puartât ae lûs i rescj di un complès architetonico paleocristian dal secul V d.d.C. e une vascje batesimâl cetant interessante.

Tor la fin di Otubar dal 2018, la aluvion causade dal grant burlaç Vaia e la esondazion dal Dean a àn fat lâ sot aghe la aree archeologjiche, la glesie e cualchi cjase li dongje, dal dut sepulidis dai pantans e dal sfassei vegjetâl. La inondazion e à fat un grum di dams aes struturis dal cuviert de aree archeologjiche e al sisteme di iluminazion e di ventilazion dal font dal batisim che al è te glesie.

In graciis de convenzion ODCPC 558/2018, siglade tra il comissari delegât de Protezion civîl dal Friûl-Vignesie Julie e la Sorintendence ABAP-FVG intal ambit dal finanziament dal "Plan intervents VAIA 2020", al è stât infin pussibil inviâ i lavôrs inte aree di Sant Martin, par tornâ a dâ al public la fruibilitât plene di cheste aree archeologjiche, e dal font dal batisim. I lavôrs a àn podût tacâ ancje in graciis de colaborazion laboriose dal Comun di Davâr e de Parochie de Trinitât Santissime. I lavôrs di sistemazion de cuvierture de aree archeologjiche ju fâs la societât cooperative L'Unione; invezit la risistemazion dal sisteme eletric e di ventilazion dal

font dal batisim de glesie al è par cure de dite VS Impianti che e veve za progetât e metût in vore chescj implants tal 2004, cuant che a jerin tacadis lis oparis di valorizazion dal complès paleocristian. Une volte finîts i lavôrs di sistemazion de aree archeologjiche, la dite Diego Malvestio & c. Snc e finirà di netâ vie e di restaurâ i rescj archeologjics in mût di dâi une gnove vite a chest complès impuartant de Cjargne.

La L.A.I.R.A. srl e coordene i aspiets de sigurece intal cantîr. La Sorintendence ABAP-FVG e je la responsabile dai interventi che a son in program a Davâr, stant che si trate dal sogjet ausiliari dal comissari delegât.

La aree archeologjiche de glesie di Sant Martin

Il complès archeologjic si disvilupe suntune superficie di plui di 500 m², sedi dentri de glesie di Sant Martin che difûr, intune aree cuvierte di podê visitâ; al cjape dentri i rescj di une basiliche paleocristiane imponente, e di un edifici di forme poligonâl cun tal mieç la vascje batesimâl, leade al ambit culturâl di Aquilee.

I rescj archeologjics a son visibii parsore di altris plui antîcs: struturis murariis e pavimentazions di une vile tarde romane (secui IV-V d.d.C.) e sepulturis dal periodi alt medievâl (secui V-VIII d. d. C.).

Intal cors de alte Ete di Mieç, la glesie e je stade bandonade e i batisims si fasevin te glesie di Sante Marie di Guart; dut câs, i rescj archeologjics a somein dimostrâ une continuitât tal ûs di cheste aree, salacor in conession cu lis ativitâts de fiere di Sant Martin (secui XII – XVII).

Il contest ecezionâl e la estension considerevule di chescj rescj archeologjics a fasin di Davâr un sît pardabon impuartant pal teritori de Cjargne: di fat, al è un dai plui grancj complès batesimâi rurâi cjatâts fin vuê in Italie.

Triest ai 23 di Otubar dal 2020.

Ufici Comunicazion e Promozion de Sorintendence Archeologjie, Bielis arts e Paisaç dal Friûl-Vignesie Julie

sabap-fvg.comunicazionepromozione@beniculturali.it

+39 040 4527527 | +39 329 0738582

<http://www.sabap.fvg.beniculturali.it>;

[@SABAP.FVG](#)